

Dangzgo dwg daeglwg bohlungz gou, de dwg hagseng roek nienzgaep, beix gou bi ndeu. Bohlungz gou dwg baujgezyenz mbanj raeuz, dangzgo gou gingciengz bang bohlungz guhhong, baenz boux baujgezyenz iq ndeu. Dangzgo caeuq bohlungz ityiengh, doiq faenh hong neix nyinhcaen fucwz, vunz ndaw mbanj bouxboux cungj haenh.

Geiq ndaej aen singhgiz gonq, doengzdoh Siujyungj iu gou gaen de daengz ndaw bouq gai doxgaiq bae cawx haujlai doxgaiq gwn. Raeuz itmienh byaij itmienh gwn, lij angqvauvau dwk gangjriu. Gou dawz daehbaucang gijgwn cuengq haeuj ndaw daehsuli, dajsuenq gveng haeuj aen doengjnyapnyaj bae, mbouj siengj daengz Siujyungj baez dued gvaqbae cigsoh gveng youq gwnz lohmbanj.



Gou gienq de dawz nyapnyaj gip hwnjdaej gveng haeuj doengjnyapnyaj bae, de sawqmwh hemq hwnjdaej: “Mwngz caen gyaez guenj gij saeh vunz, gou mbouj caeuq mwngz

Dangzgo

堂哥

武鸣县仙湖镇中桥小学五(1)班 梁敬辉

guhcaemz lo.” Gangj sat fatheiq dwk byaijdeuz lo. Gou cijndei gungj hwet bae gip nyapnyaj. Sawqmwh dingqny miz vunz hemq: “Siujyungj, mwngz daengx mbat he!” Gou ndwn soh swnh sing baez yawj, yienzlaiz dwg dangzgo hemq Siujyungj. Seizneix, Siujyungj gaeng byaij bae maqhuz gyae lo, dingqny sing hemq, hix nyex gyaeuj doxdaq, yawjraen dangzgo cingq yawj

swhgeij, daegdaengq caemdingh dwk cam: “Mwngz miz maz saeh ne?” Dangzgo vix daeh nyapnyaj, yiemzsuk dwk doiq de naeuz: “Mwngz hix dwg hagseng roek nienzgaep lo, wnggai guh yiengh ndei hawj daegnuengx dahnuengx yawj cij deng. Cingj mwngz dawz daeh nyapnyaj neix gveng haeuj aen doengjnyapnyaj bae!” Siujyungj roxnyinh swheij loek lo, cijndei lauxlaux saedsaed byaij dauqma, dawz daeh nyapnyaj gveng haeuj ndaw doengj bae.

Daj baezneix hwnj, Siujyungj hix caeuq dangzgo ityiengh, baenz boux baujgezyenz ndaw mbanj lo. Raeuz doengzsim doengzhoz, dawz “Vujmingz Gyaeunde, Lajmbanj Cenghseuq” hangh hozdung neix guh ndaej engqgya ndei.

(指导老师:潘文清)



Gumz Nyapnyaj Bienq-baenz Dieg Guh' angq

垃圾坑变成娱乐场

武鸣县仙湖镇中桥小学六(3)班 周晶亮

Gwn haeuxcaez sat le, raeuz youh daengz dieg guh-angq bakmbanj bae guhcaemz. Va, gizneix gaeng miz haujlai vunz lo, gyoengq daxbuz comz youq itheij lwnhgoj; bouxsai cingq dwk geizciengh; daxmeh caeuq mehbaj, mehsimj cinjbi diuqfoux. Gij yinhyoz 《Yied Daeuj Yied Ndei》 yiengj hwnjdaej, geijcib vunz diuq hwnj gvjangcangzvuj, cezcou dwg yienghhaenx soengswt, dungcoz dwg yienghhaenx gyaeunde. Raeuz hix riengz gyoengqde diuq hwnjdaej. Diuq souj ndeu sat le, cik ga gou miz di naet lo. Gou naengh youq henz, yawj gyoengqvunz naj riu sim yungz, ndawsim ngeix haujlai haujlai.

Ranzmbanj gou dwg aen mbanj iq bienbik ndeu, gizneix liz singz gig gyae. Gaxgonq mbanj raeuz vanzging gig ca, loh cienzbouh dwg lohdoem, dauqcawq gumzgumz gamxgamx. Ci hung hai gvaqdaej couh gienj hwnj baenz raq baenz raq doemboeng, saek dwk hawj mwngz diemheiq mbouj hwnj bae. Bungzdaengz seiz fwndoeck engq cuet, gwnz loh cungj dwg boengz, baez mbouj siujsim couh loemq roengz ndaw gumz bae, danghnaez miz ci hai gvaqdaej, gij boengz couh sinz daengz gwnz ndang bae uq liux. Laj din raeuz yienzlaiz dwg aen gumz hung ndeu, vunzmbanj cungj dawz nyapnyaj boeg youq gizneix, gizneix ciemhciemh bienqbaenz gij dieg gwnninz duznou lo. Vunz lohgvag cungj mbouj nyienh yawj gvaqbae.

“Lajmbanj Cenghseuq, Vujmingz Gyaeunde” hozdung youq daengx yienh gak dieg gaihcang hwnjdaej, mbanj raeuz hix mbouj laehvaih, bouxsai bouxmbwk, bouxlaux lwgnyez cungj hengzdoengh hwnjdaej, gyahauej ndaw cawzcingh nyapnyaj hozdung bae. Cibgeij ngoenz seizgan, aen mbanj bienq yiengh lo: Lohdoem bienqbaenz lohsuijniz, gumz nyapnyaj bienqbaenz dieg guh' angq……

Gou saeng, riengz sevei mboujduenh cinbu, ranzmbanj raeuz itdingh bienq ndaej yied daej yied ndei.

(指导老师:潘文清)

Bang Douqlwg Hau Gvaq Dah

帮小白兔过河

环江毛南族自治县思恩镇清潭小学二年级 覃月密

Haetromh, daxmeh douqlwg vix aen swx cang rim lauxbaeg doiq douqlwg hau naeuz: “Lwg ha, mwngz naengz mbouj naengz bang daxmeh dawz loz lauxbaeg neix soengq bae hawj daxdaiq ne?” Douqlwg hau angq naeuz: “Daxmeh, gou gig haengj bang mwngz guh di saeh!” Douqlwg hau riuj aen swx couh bae ranz daxdaiq lo.

Youq gwnz loh, douqlwg hau itmienh byaij itmienh ciengqgo. Sawqmwh, diuz dah ndeu lanz youq baihnaj. Yienzlaiz, haemhlwenz ngamq doek raq fwn ndeu, raemxdah hwnj lo, muenx gvaq giuz iq gwnz dah. Douqlwg hau gvaq mbouj ndaej



lo, de gip ndaej daej hwnjdaej. Duz meuzva youq henz dah iq dingqny sing daej douqlwg hau, ganjgip gvaqdaej cam: “Douqlwg hau, mwngz baenzlawz daej lo?” Douqlwg hau naeuz: “Gou dapwng bang daxmeh soengq lauxbaeg bae hawj daxdaiq, hoeng raemxdah hwnj lo, gou bae mbouj ndaej.” Meuz raiz lienzmuengz nai naeuz: “Douqlwg hau, gaej gip, gou bang mwngz siengj banhfap.” Meuz raiz dauqma ranz swheij, ra daej batfaex, faexbenj, faexsaux, gienyouzraemx. De dawz faexbenj gyaq youq gwnz batfaex, dawz aen swx cuengq youq gwnz faexbenj, doeklaeng hawj douqlwg hau naengh youq ndaw batfaex, meuz raiz dawz gyaeuj faexsaux ndeu, douqlwg hau dawz gyaeuj faex ndeu, meuz raiz daep hwnj gienyouzraemx, soengq douqlwg hau gvaq dah. Mbouj geij nanz, meuz raiz couh dawz douqlwg hau swnhleih soengq daengz mbiengj dah baihaenx lo. Douqlwg hau gikdoengh dwk doiq meuz raiz naeuz: “Meuz raiz daeggo, docih mwngz soengq gou gvaq dah.” Meuz raiz naeuz: “Mbouj yungh lo, mwngz vaiqdi dawz lauxbaeg soengq daengz ranz daxdaiq ba, gaej hawj gyoengqde caj nanz lo!”

(指导老师:邓秀妮)

Gij Yienzsaek Rumz

风的颜色

Rumz dwg saek heuyauyau
De heuh ndiu nywjiq caeuq goliux
Ciu daej mbungqmbaj caeuq duzrwi

Rumz dwg saek maeqlili
De nyumx hawj vadauz gyaeugetget
Beng daej gij heiqrangz va'ngaux

Rumz dwg saek henj ndongqmyanmyan
Ndaw doengh ciengq gij go fungsou
Gwnz faex venj daengloengz youh hung youh fag

Rumz dwg saek hausagsag
De yungh nithaenq suek gij dangzrwi henjndongq
Faen hawj gyoengq douqndoeng caeuq noucoengz mbouj haengj ninzdoeng haenx

(Cih Moz)

